

Un coleccion valioso pa nos historia y cultura

Minister Hooyboer-Winklaar y Museo di Antigüedad considerando diferente opcion pa structura presentacion na publico



MINISTER di Asuntonan Economico, Asuntonan Social y Cultura, Sra. Michelle Hooyboer-Winklaar a wordo acerca pa e famia cu ta doño di e coleccion mas grandi di articulonan di antigüedad na Aruba conoci como e Museo di Antigüedad, situa den e cas di nan mayornan na Timbalstraat na Dakota. E museo a wordo estableci ora cu e tata di e famia, un coleccionista ferviente, Juan Mario Odor (q.e.p.d.) a pone e coleccion aki hunto den na su cas y a present'e na publico. Sr. Odor tambe tabata un "arkeologo" amateur cu tambe den un otro camber di e cas a presenta un coleccion di cralchi, resto di pochi di klei y tambe un coleccion "geologico", pues di e diferente tipo di santo y piedra. Famia Odor a acerca Minister Hooyboer-Winklaar pa presenta e coleccion di antigüedad precioso na dje cu e peticion pa dialoga riba con lo por trece y mustra e coleccion aki na publico cu mas frecuencia y na un forma structura. Famia Odor ta habri e museo pa publico solamente dos biaha pa aña, pero kier pa e coleccion grandi di nan tata por wordo admira cu mas frecuencia. Minister Michelle Hooyboer-Winklaar a bishita e museo acompaña pa e director di Museo Historico y representantenan di Ministerio di Cultura pa mira e coleccion y bin cu diferente posibilidad. Entre e opcionnan cu titular di cultura a menciona ta e compra di e coleccion completo of compra di un parti di e coleccion, pero den tur caso, loke ta e meta di tanto famia Odor como Minister Hooyboer-Winklaar ta pa mas hende por disfruta di dje. E mandatario a expresa cu durante su bishita nan a admira un cantidad di articulonan antiek, asina valioso cu ta hiba un persona bek den historia y cultura di Aruba, productonan hopi bieu y cosnan cu e generacionnan mas jong nunca a wordo mustra cu nos tabatin. Minister Michelle Hooyboer-Winklaar a bisa cu e meta ta pa por ofrece esakinan na e comunidad henter, incluyendo scolnan y organisacionnan social, entre otro. E bishita na Museo di Antigüedad tabata un ocasion hopi ameno y sumamente interesante. "Esey ta e intencion di cultura, no solamente tin nan colecciona, pero pa hende por admira nan y na mes momento haya splicacion", asina Minister Michelle Hooyboer-Winklaar a enfatisa.

